



UPA 2016/070-00

02.06.2016

Ineqarnermut akiliutit qaffakkiartuinnartut, kiisalu boligsikring tapiissutit qaffanneqarnissaat, aammalu kiassarnermut akiliutit qaffasippallaarnerat pillugit apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen Partii Naleraq)

Inatsisartunut ilaasortaq Hans Enoksen Partii Naleraq, siunnersuuteqarpoq, ineqarnermut akiliutit qaffakkiartuinnartut, kiisalu boligsikring tapiissutit qaffanneqarnissaat , aammalu kiassarnermut akiliutit qaffasippallaarnerat pillugit.

Siunnersuut Partii Naleqqamiit imannak oqaaseqarfigissuarput.

Inatsisartunut ilaasortaq Hans Enoksen, ilumoorluinnarpoq oqarami, ineqarnermut kiassarnermullu akit qaffakkaluttuinnartut aamma ilaqutariit ilarparujussui meerartallit aningaasarsiakitsut inuuniarnikkut assut ilungersunartumik inissisimasut.

Tassami naatsorsueqqissaartarfiup paasissutissiissutai naapertorlugit inuit ilaqutariillu 70-75 procentii akissarsiakinnerpaajunngikkuni akunnattumik akissarsiaqartuupput, taamaammallu ilaqutariippasuit ineqarnermut tapiissutinik ikiorserneqanngikkunik, naliginnaasumik inissiap qaammammut akia nammineerlutik akilersinnaanngilaat.

Tamannalumi aamma aningaasaqarnikkut ingerlatsineq pillugu nassuiaammi ersarittorujussuarmik allaaserineqarpoq.

Taamaammat tupinnangitsumik inuit ilaqutariillu katillugit 500 missaat ukiuni kingullerni inigisaminniit anisitaanikuupput. Tupinnaqaaq inuit taama atugassaqartinneqartut inuuniallaqqissusii.

Tamakkumi aamma ilaat meerartaqarput, uffa-massa naalagaaffiit peqatigiit isumaqatigiissutaat naapertorlugu meeqqat tamarmik ineqartinneqarnissartik pisinnaatitaaffingaat.

Isumaqarpungut ineqarnermut tapiissutit (boligsikring) nalilersoqqinnissaa piffissanngortoq, tassami ineqarnermut tapiissutit ukiuni arlalinni allannngortinneqarsimangillat, naak suut tamarmik akitsoraluttuinnaraluartut.

Aamma siunnersuuteqartut oqarneratuut akinik apparsaanissaq pimoorullugu sulissutigineqartariaqarpoq, minnerunngitsumik aningaasartuutikillisaanissaq aamma eqqarsaatigalugu, tassami inissiarpassuit inoqaratik matuuginnakkat il.il. ineqartut akiliutaannut qaffassaaqataasut iluarsiiqqineqartariaqarput.

Tassami naalackersuisut akissuteqarnerminni tamanna aamma uppersarparat, tassa ineqarnermut akiliutit 29,2%-inik qaffariarsimapput Kiassarnermut aningaasartuutit 73,7%-inik qaffariarsimallutik aammalu imermut aningaasartuutit 21,2%-inik qaffariarsimapput

Taamaattumik-una ilaqtariipparujussuit angummanniapiloorlutik inissisimasut oqaluttarfik manna atorlugu paasisitsiniutigisaqattaartuaripput. Pissutsit taakku piviusuummata aamma iluarsineqartariaqartut.

Siorna Naalackersuisunut suleraatsimi § 37 naapertorlugu apeqquteqaatitsinni paasitinneqarpugut nukissiorfiit kiammik maangaannartitsisarnerat ukiumut 39 mio kr.-it missaani annertussuseqartoq. Taamaammat aningaasat atorluarneqassappata pissutsit taamaattut aamma iluarsisariqarput.

Sutigut tamatigut ingerlatsinermut aningaasartuutit qaffakkaluttuinnarput, taamaattumik pisortat inissiaataannik aqutsineq akikillisaaffigineqartariaqarpoq. Apeqquserujussuuartariaqartullu ilagaat, soormi pisortat inissiaataat assigiinngitsunut arlalinnut aggulullugit, tamaasa immikkut siulersuisulersorlugit, tamaasa immikkut direktørilersorlugit ingerlanneqassappat ?

Taamaammat pisortat inissiaataasa ingerlanneqarnerat aqunneqarnerallu allanngortinneqartariaqarpoq, allaffissornerujussuaq, minnerunngitsumillu inissianik atorluanerunikkut aaqiivigineqartariaqarpoq, tassami inuppassuit inissaaleqipput, inissiallu ilarpassuit inoqanngitsut asuli kiassarneqarpoq ineqartut allat akiligaannik.

Pissutsit taamaattut iluarsineqartariaqarput, tassami siuliani eqqartukkavut innersuussutigalugit takoqqiinnarparput allanngortitsiniaannarluni allanngortitsinerit aamma inuiaqatigiinnut ilaqtariinnullu ataasiakkaanut qanoq sunniuteqarnerlussinnaaneri.

Taamaattumik allannguinnissanik pilersaaruterpassuit maanna ingerlanneqartut, tamakku inuiaqatigiinnut inunnullu ataasiakkaanut kinguneriumaangassaasa nalilersorluarneqartarnissaat manna iluatsillugu kaammattuutingaarput.

Naalackersuisut ineqarneq pillugu 2015-mi upernaakkut isumasioqatigiissitsinerat ineqartunut qanoq sunniuteqarnerasoq paaserusupparput aamma Naalackersuisut illunik nutaanik saviminernik atortulersuutilinnik pilersitsiniarnerat sumut killinnersoq aamma paaserusupparput.

Tassami siunnersuuteqartup oqarneratuut pissutsit pitsaanerulissappata taava suna tamaat sukumiisumik oqallissutigisariaqalerparput.

Inatsisartut oqaaseqaatissaannut siunnersuut taperserparput.